



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆ
Ա Շ Խ Ա Տ Ա Կ Ա Ր Գ Ա Յ Ի Ն Ո Ր Ո Շ ՈՒ Մ**

««ՆՈՐՎԻԿ» ԼՈՒՎԿ ՓԲԸ ԴԻՄՈՒՄԻ ՀԻՄԱՆ ՎՐԱ՝ ՀՀ ՔԱՂԱՔԱՑԻԱԿԱՆ ԴԱՏԱՎԱՐՈՒԹՅԱՆ ՕՐԵՆՍԱԳՐՔԻ 126-ՐԴ ՀՈԴՎԱԾԻ 1-ԻՆ ՄԱՍԻ 2-ՐԴ ԿԵՏԻ՝ ՍԱՀՄԱՆԱԴՐՈՒԹՅԱՆԸ ՀԱՄԱՊԱՏԱՍԽԱՆՈՒԹՅԱՆ ՀԱՐՑԸ ՈՐՈՇԵԼՈՒ ՎԵՐԱԲԵՐՅԱԼ» ԳՈՐԾԻ ՔՆՆՈՒԹՅՈՒՆԸ ՄԵՐԺԵԼՈՒ ՄԱՍԻՆ

Սահմանադրական դատարանը, քննության առնելով ««Նորվիկ» ԼՈՒՎԿ ՓԲԸ դիմումի հիման վրա՝ ՀՀ քաղաքացիական դատավարության օրենսգրքի 126-րդ հոդվածի 1-ին մասի 2-րդ կետի՝ Սահմանադրությանը համապատասխանության հարցը որոշելու վերաբերյալ» գործի քննությունը մերժելու մասին առաջարկությունը,
Պ Ա Ր Զ Ե Ց .

1. 2026 թվականի հուլիսի 8-ին Սահմանադրական դատարան է մուտքագրվել ««Նորվիկ» ԼՈՒՎԿ ՓԲԸ (այսուհետ՝ Դիմող, ներկայացուցիչ՝ փաստաբան Էմմա Պետրոսյան) դիմումը, որով Դիմողը խնդրել է.

«ՀՀ քաղաքացիական դատավարության օրենսգրքի 126-րդ հոդվածի 1-ին մասի 2-րդ կետը, այն իրավակիրառական բովանդակությամբ, ըստ որի 2017 թվականին դատաքննության նախապատրաստական փուլում հայցից հրաժարվելու հիմքով վարույթի կարճումը համարվում է նույն պահանջով հետագա դիմելու անհաղթահարելի արգելք, ճանաչել ՀՀ Սահմանադրության 61-րդ հոդվածի 1-ին մասին, 63-րդ հոդվածի 1-ին մասին, 73-րդ, 75-րդ, 78-րդ, 79-րդ և 80-րդ հոդվածներին հակասող և անվավեր»:

2. Ներկայացնելով թիվ ԵԱԴԴ/0156/02/17 և թիվ ԵԴ2/0808/02/26 քաղաքացիական գործերի դատավարական նախապատմությունները՝ Դիմողը Սահմանադրական դատարանի առջև բարձրացնում է հետևյալ իրավական հարցադրումները. արդյո՞ք ՀՀ

քաղաքացիական դատավարության օրենսգրքի 126-րդ հոդվածի 1-ին մասի 2-րդ կետն այնքանով, որքանով այն մեկնաբանվում և կիրառվում է այնպես, որ նախկին վարույթում պահանջից հրաժարվելու հիմքով գործի վարույթի կարճումը համարվում է նույն պահանջով հետագայում դատարան դիմելու անհաղթահարելի արգելք նաև այն դեպքերում, երբ հրաժարումը փաստացի կատարվել է դատաքննության նախապատրաստական փուլում, և այդ ժամանակահատվածում գործող՝ 1998 թվականի հունիսի 17-ին ընդունված և 2018 թվականի ապրիլի 9-ին ուժը կորցրած ՀՀ քաղաքացիական դատավարության օրենսգրքի 110-րդ հոդվածի 3-րդ մասը նախատեսում էր կրկին դիմելու բացառություն, համապատասխանում է Սահմանադրության 61, 63, 78 և 79-րդ հոդվածներին և չի խախտում անձի արդար դատաքննության իրավունքը, արդյո՞ք Սահմանադրության 63-րդ հոդվածով և «Մարդու իրավունքների և հիմնարար ազատությունների պաշտպանության մասին» եվրոպական կոնվենցիայի 6-րդ հոդվածի 1-ին կետով երաշխավորված՝ պատճառաբանված դատական ակտի իրավունքին համապատասխանում է այն իրավակիրառ պրակտիկան, որի արդյունքում ՀՀ դատարանները, լուծելով գործի ելքի համար վճռորոշ նշանակություն ունեցող փաստական հարցը (այն է՝ թիվ ԵԱԴԴ/0156/02/17 քաղաքացիական գործով հայցից մասնակի հրաժարման դատավարական պահի որակումը՝ նախապատրաստական, թե՛ դատաքննության փուլ), սահմանափակվել են բացառապես «Դատալեքս» դատական տեղեկատվական համակարգում առկա ոչ միանշանակ ձևական նշման վերարտադրմամբ՝ առանց ինքնուրույն հետազոտելու և գնահատելու համապատասխան նիստի արձանագրության բուն բովանդակությունը:

Դիմողը նշում է, որ վիճարկվող դրույթին տրված այն մեկնաբանությունը, համաձայն որի՝ անկախ նրանից, թե ի՞նչ կարգավորումներ են սահմանված եղել 2017 թվականին գործած ՀՀ քաղաքացիական դատավարության օրենսգրքով (թիվ ԵԱԴԴ/0156/02/17 քաղաքացիական գործով համապատասխան վճռի կայացման պահին), արգելվում է նույն անձանց միջև նույն առարկայի մասին վեճի քննությունը, վիճարկվող դրույթի հետապնդած իրավաչափ նպատակը, այն է՝ իրավական որոշակիության պաշտպանությունը և նույն վեճի բազմակի քննության կանխումը, վերաձվում է բացարձակ արգելքի այն իրավիճակում, որի համար 2017 թվականին

գործած ՀՀ քաղաքացիական դատավարության օրենսգիրքը սահմանել էր բացառություն:

Նման մեկնաբանության հետևանքով, Դիմողի պնդմամբ, ինքը ոչ միայն չի ստանում իր պահանջի ըստ էության քննություն, այլև զրկվում է այն դատավարական ընտրության հետևանքից, որը 1998 թվականի հունիսի 17-ին ընդունված և 2018 թվականի ապրիլի 9-ին ուժը կորցրած ՀՀ քաղաքացիական դատավարության օրենսգիրքը հստակորեն կապել էր դատաքննության նախապատրաստական փուլում հայցից հրաժարվելու հետ: Հավելելով՝ Դիմողը պնդում է, որ դատավարական արգելքն այդպիսով գործում է ոչ թե որպես իրավական որոշակիության համաչափ միջոց, այլ որպես դատարանի մատչելիության ամբողջական փակուղի:

Դիմողը գտնում է, որ ՀՀ քաղաքացիական դատավարության օրենսգրքի 126-րդ հոդվածի 1-ին մասի 2-րդ կետն այնքանով, որքանով այն մեկնաբանվում և կիրառվում է այնպես, որ նախկին վարույթում պահանջից հրաժարվելու հիմքով գործի վարույթի կարճումը համարվում է նույն պահանջով հետագայում դատարան դիմելու անհաղթահարելի արգելք նաև այն դեպքերում, երբ հրաժարումը փաստացի կատարվել է դատաքննության նախապատրաստական փուլում, և այդ ժամանակահատվածում գործող՝ 1998 թվականի հունիսի 17-ին ընդունված և 2018 թվականի ապրիլի 9-ին ուժը կորցրած ՀՀ քաղաքացիական դատավարության օրենսգրքի 110-րդ հոդվածի 3-րդ մասը նախատեսում էր կրկին դիմելու բացառություն, հանգեցնում է Սահմանադրության 61, 63, 73, 74, 75 և 78-րդ հոդվածների խախտման:

Դիմողը պնդում է, որ թեև հայցադիմումը վարույթ ընդունելու պահին դատարանն այն գնահատում է այդ պահին գործող իրավակարգավորումներին համապատասխան, այնուամենայնիվ, այն պետք է կիրառվեր՝ հաշվի առնելով 1998 թվականի հունիսի 17-ին ընդունված և 2018 թվականի ապրիլի 9-ին ուժը կորցրած ՀՀ քաղաքացիական դատավարության օրենսգրքի 110-րդ հոդվածի 3-րդ մասով սահմանված իրավակարգավորումը: Հակառակ մեկնաբանության պարագայում, ըստ Դիմողի, ստացվում է, որ սահմանափակվում է հայցվորի արդար դատաքննության իրավունքն այն հիմքով, որ վերջինս կատարել է գործողություններ, որոնցով սպառել է իր այդ իրավունքը, սակայն նման գործողությունների կատարման պահին առկա չէր խնդրո առարկա իրավունքի

սահմանափակումը նախատեսող օրենք: Հետևաբար՝ Դիմողը նշում է, որ նման մեկնաբանության պայմաններում խախտվում է Սահմանադրության 79-րդ հոդվածով երաշխավորված՝ իրավական որոշակիության սկզբունքը, արդյունքում նաև իր՝ Սահմանադրության 63-րդ հոդվածով երաշխավորված՝ արդար դատաքննության հիմնական իրավունքը:

Դիմողը գտնում է, որ թիվ ԵԴ2/0808/02/26 քաղաքացիական գործի շրջանակներում ձևավորված իրավիճակը իրավական նորմի կիրառման ընթացակարգային կամայականություն է, այսինքն՝ վիճարկվող դրույթով նախատեսված չափանիշների ստուգման ընթացակարգը կիրառվել է առանց ապացուցողական հիմքի պատշաճ հետազոտման, որը վերաբերում է հենց իրավակիրառ գործընթացի՝ Սահմանադրությանը համապատասխանության հարցին:

3. Ելնելով դիմումի և կից փաստաթղթերի ուսումնասիրությունից, ինչպես նաև ղեկավարվելով «Սահմանադրական դատարանի մասին» սահմանադրական օրենքի (այսուհետ նաև՝ Սահմանադրական օրենք) 29 և 69-րդ հոդվածներով՝ Սահմանադրական դատարանը գտնում է, որ սույն անհատական դիմումով գործի քննությունը ենթակա է մերժման՝ հետևյալ պատճառաբանությամբ.

*Սահմանադրության 169-րդ հոդվածի 1-ին մասի 8-րդ կետի համաձայն՝ Սահմանադրական դատարան կարող է դիմել յուրաքանչյուր ոք՝ կոնկրետ գործով, երբ առկա է դատարանի վերջնական ակտը, սպառվել են դատական պաշտպանության բոլոր միջոցները, և վիճարկում է այդ ակտով իր նկատմամբ կիրառված նորմատիվ իրավական ակտի դրույթի սահմանադրականությունը, **ինչը հանգեցրել է Սահմանադրության 2-րդ գլխում ամրագրված իր հիմնական իրավունքների և ազատությունների խախտման՝ հաշվի առնելով նաև համապատասխան դրույթին իրավակիրառ պրակտիկայում տրված մեկնաբանությունը:***

Սահմանադրական վերոհիշյալ նորմն իր ամրագրումն է ստացել նաև Սահմանադրական օրենքի 69-րդ հոդվածի 1-ին մասում, որը սահմանում է այն հիմքերը, որոնց միաժամանակյա առկայության պարագայում ֆիզիկական կամ իրավաբանական անձը

կոնկրետ գործով կարող է անհատական դիմում ներկայացնել Սահմանադրական դատարան: Դրանք են՝

ա) երբ կոնկրետ գործով առկա է դատարանի վերջնական ակտը,
բ) երբ սպառվել են ներպետական դատական պաշտպանության բոլոր միջոցները,
գ) երբ վիճարկվում է այդ ակտով իր նկատմամբ կիրառված նորմատիվ իրավական ակտի դրույթի սահմանադրականությունը, **ինչը հանգեցրել է Սահմանադրության 2-րդ գլխում ամրագրված իր հիմնական իրավունքների և ազատությունների խախտման՝ հաշվի առնելով նաև համապատասխան դրույթին իրավակիրառ պրակտիկայում տրված մեկնաբանությունը:**

Սահմանադրական օրենքի 29-րդ հոդվածի 1-ին մասի 6-րդ կետի համաձայն՝ Սահմանադրական դատարանը գործի քննությունն ամբողջությամբ կամ մասամբ մերժելու մասին աշխատակարգային որոշում է ընդունում սույն օրենքի 69-րդ հոդվածով նախատեսված **այլ դեպքերում:**

Սահմանադրական օրենքի 69-րդ հոդվածի 5-րդ մասի համաձայն՝ *անհատական դիմումներով գործի քննությունը, ի թիվս այլնի, կարող է մերժվել նաև այն դեպքերում, երբ անհատական դիմումն ակնհայտ անհիմն է:*

Սահմանադրական դատարանը 2009 թվականի մարտի 17-ի [ՍԴԱՌ-21](#) աշխատակարգային որոշմամբ արձանագրել է, որ «(...) անհատական դիմումների քննությունը կարող է մերժվել նաև այն դեպքերում, **երբ անհատական դիմումն ակնհայտ անհիմն է:**

(...) անհատական դիմումն ակնհայտ անհիմն է, երբ, թեև դրանում բարձրացված հարցը ենթակա է սահմանադրական դատարանի քննությանը, այնուամենայնիվ, դիմումում չեն բերվում բավարար իրավական փաստարկներ այն հիմնավորելու համար»:

Սահմանադրական դատարանը վերը նշված [ՍԴԱՌ-21](#) աշխատակարգային որոշմամբ նաև արձանագրել է, որ «(...) դիմողը պետք է փորձի բավարար կերպով իրավաբանորեն հիմնավորել, թե **իր սահմանադրական որ իրավունքներն են խախտվել և ինչ անմիջական պարճառահետևանքային կապ է առկա վիճարկվող օրինադրույթի և իր իրավունքների խախտման փաստի միջև:** Նշված պահանջին

համապատասխան՝ դիմողը պետք է նաև դիմումում առաջադրված հարցի հիմքում ներկայացնի իրավաբանորեն փաստված հանգամանքներ և նյութեր (...):»:

Միաժամանակ, Սահմանադրական դատարանը 2009 թվականի նոյեմբերի 24-ի [ՍԴՈ-839](#) որոշմամբ իրավական դիրքորոշում է արտահայտել առ այն, որ *եթե դիմողի կողմից չի հիմնավորվում վիճարկվող դրույթի և իր իրավունքների ենթադրյալ խախտման փաստի միջև պատճառահետևանքային կապը, ապա տվյալ դիմումն ակնհայտ անհիմն է:*

Այս առումով Սահմանադրական դատարանը հարկ է համարում փաստել, որ Սահմանադրական դատարան ներկայացվող անհատական դիմումների հիմնավորված լինելու պահանջը, համաձայն որի՝ դիմողը պետք է հիմնավորի, թե իր սահմանադրական ո՞ր իրավունքն է խախտվել, և ի՞նչ անմիջական պատճառահետևանքային կապ է առկա վիճարկվող օրինադրույթի և իր իրավունքի խախտման միջև, **չի կարող պահպանված համարվել բոլոր այն դեպքերում, երբ դիմողը պարզապես հղում է կատարում Սահմանադրության 2-րդ գլխում ամրագրված որևէ հիմնական իրավունքի և (կամ) ազատության՝ առանց ներկայացնելու վիճարկվող օրինադրույթի և իր համապատասխան հիմնական իրավունքի և (կամ) ազատության ենթադրյալ խախտման փաստի միջև պատճառահետևանքային կապի առկայության բավարար հիմնավորումներ:**

Սահմանադրական դատարանը 2022 թվականի հուլիսի 12-ի [ՍԴԱՈ-126](#) աշխատակարգային որոշմամբ արձանագրել է, որ «(...) **անձը պետք է անհատական դիմումի շրջանակներում ուղղակիորեն մատնանշի և հիմնավորի վիճարկվող նորմատիվ իրավական ակտի կոնկրետ դրույթի և Սահմանադրության 2-րդ գլխում բովանդակվող իր հիմնական իրավունքի և/կամ ազատության ենթադրյալ հակասության անմիջական պատճառահետևանքային կապը:** Այլ կերպ ասած՝ **վիճարկվող դրույթի ենթադրյալ հակասահմանադրականությունը պետք է ուղղակիորեն հանգեցնի Սահմանադրության 2-րդ գլխով երաշխավորված որևէ հիմնական իրավունքի և/կամ ազատության խախտման/սահմանափակման:** Այս առնչությամբ Սահմանադրական դատարանը հարկ է համարում շեշտադրել, որ Սահմանադրության 2-րդ գլխում բովանդակվող սահմանադրաիրավական սկզբունքներին վիճարկվող իրավանորմերի հակասու-

**թյունը սահմանադրաիրավական իմաստով չի կարող անհատական գանգա-
 փարկման առարկա դառնալ, եթե վերջնարդյունքում չի հանգեցնում անձի՝ Սահմա-
 նադրության 2-րդ գլխով նախատեսված հիմնական իրավունքի և/կամ ազատության
 խախտման/սահմանափակման»:**

Վերը ներկայացված դրույթներով ամրագրված կարգավորումները, Սահմանա-
 դրական դատարանի վերոնշյալ որոշումներով արտահայտած իրավական դիրքորոշում-
 ները համադրելով սույն գործի փաստերի հետ՝ Սահմանադրական դատարանը հանգում
 է հետևյալ եզրակացության.

անհատական դիմումի շրջանակում նորմատիվ իրավական ակտի դրույթի
 սահմանադրականությունը վիճարկելու պարագայում **անհրաժեշտ է բավարար
 կերպով իրավաբանորեն հիմնավորել, որ վիճարկվող դրույթը (սույն պարագայում
 նաև իրավակիրառ պրակտիկայում դրան տրված մեկնաբանությունը, դրանում առկա
 ենթադրյալ օրենսդրական բացը) հանգեցրել է Սահմանադրության 2-րդ
 գլխում ամրագրված որևէ հիմնական իրավունքի և (կամ) ազատության խախտման,
 որը տվյալ պարագայում տեղի չի ունեցել:**

Մասնավորապես՝ Դիմողը սույն անհատական դիմումի շրջանակներում վիճարկում
 է ՀՀ քաղաքացիական դատավարության օրենսգրքի 126-րդ հոդվածի 1-ին մասի 2-րդ
 կետի (իրավակիրառ պրակտիկայում դրան տրված մեկնաբանության, դրանում առկա
 ենթադրյալ օրենսդրական բացի)՝ Սահմանադրության 61, 63, 73, 75, 78, 79 և 80-րդ
 հոդվածներին համապատասխանությունը, ինչի կապակցությամբ Սահմանադրական
 դատարանը հարկ է համարում արձանագրել հետևյալը.

Սահմանադրական դատարանը գտնում է, որ Դիմողը վկայակոչել է վիճարկվող
 դրույթի (իրավակիրառ պրակտիկայում դրան տրված մեկնաբանության, դրանում առկա
 ենթադրյալ օրենսդրական բացի) հակասությունը Սահմանադրության 61 և 63-րդ
 հոդվածներով երաշխավորված՝ համապատասխանաբար արդյունավետ դատական
 պաշտպանության և արդար դատաքննության հիմնական իրավունքներին, սակայն
**բավարար կերպով իրավաբանորեն չի հիմնավորել իր՝ տվյալ հոդվածներով
 երաշխավորված հիմնական իրավունքների խախտման փաստը, հետևաբար՝
 վիճարկվող դրույթի (իրավակիրառ պրակտիկայում դրան տրված մեկնաբանության,**

դրանում առկա ենթադրյալ օրենսդրական բացի) և համապատասխան հիմնական իրավունքների ենթադրյալ խախտման փաստի միջև պատճառահետևանքային կապի անմիջական առկայությունը:

Փոխարենը՝ Դիմողը սահմանափակվել է իր՝ Սահմանադրության 61 և 63-րդ հոդվածներով երաշխավորված հիմնական իրավունքների խախտման վերաբերյալ պնդումների պարզապես վկայակոչմամբ՝ բավարար կերպով իրավաբանորեն չհիմնավորելով իր կողմից վիճարկվող դրույթի (իրավակիրառ պրակտիկայում դրան տրված մեկնաբանության, դրանում առկա ենթադրյալ օրենսդրական բացի) և նման խախտման ընդհանրությունը, դրանց միջև անմիջական պատճառահետևանքային կապի առկայությունը՝ սույն կոնկրետ գործի հանգամանքների և առանձնահատկությունների հաշվառմամբ:

Անդրադառնալով Դիմողի կողմից վկայակոչված՝ Սահմանադրության 73, 75, 78, 79 և 80-րդ հոդվածներին՝ Սահմանադրական դատարանը հարկ է համարում արձանագրել, որ տվյալ հոդվածների բովանդակությունից բխում է, որ **կոնկրետ վերահսկողության պարագայում դրանք ինքնին չեն կարող դառնալ առանձին քննարկման առարկա, այլ կարող են դիտարկվել միայն որևէ հիմնական իրավունքի և (կամ) ազատության սահմանափակման լույսի ներքո:**

Այսպիսով, Սահմանադրական դատարանը գտնում է, որ սույն անհատական դիմումով չի հիմնավորվում ՀՀ քաղաքացիական դատավարության օրենսգրքի 126-րդ հոդվածի 1-ին մասի 2-րդ կետի (իրավակիրառ պրակտիկայում դրան տրված մեկնաբանության, դրանում առկա ենթադրյալ օրենսդրական բացի) հակասությունը Սահմանադրության 61 և 63-րդ հոդվածներին, հետևաբար՝ Սահմանադրության 73, 75, 78, 79 և 80-րդ հոդվածներին:

Այսինքն՝ **սույն անհատական դիմումն ակնհայտ անհիմն է, ինչը գործի քննությունը Սահմանադրական դատարանի կողմից մերժելու հիմք է:**

Ուստի՝ սույն անհատական դիմումով գործի քննությունը Սահմանադրական դատարանի կողմից **ենթակա է մերժման՝ «Սահմանադրական դատարանի մասին»** սահմանադրական օրենքի 29-րդ հոդվածի 1-ին մասի 6-րդ կետի և 69-րդ հոդվածի 5-րդ մասի հիման վրա՝ **դիմումն ակնհայտ անհիմն լինելու հիմքով:**

Ելնելով վերոշարադրյալից և ղեկավարվելով «Սահմանադրական դատարանի մասին» սահմանադրական օրենքի 29-րդ հոդվածի 1-ին մասի 6-րդ կետով և 69-րդ հոդվածի 5-րդ մասով՝ Սահմանադրական դատարանը **Ո Ր Ո Շ Ե Ց**.

««Նորվիկ» ԼՈՒՎԿ ՓԲԸ դիմումի հիման վրա՝ ՀՀ քաղաքացիական դատավարության օրենսգրքի 126-րդ հոդվածի 1-ին մասի 2-րդ կետի՝ Սահմանադրությանը համապատասխանության հարցը որոշելու վերաբերյալ» գործի քննությունը մերժել:

**ՍԱՀՄԱՆԱԴՐԱԿԱՆ ԴԱՏԱՐԱՆԻ
ՆԱԽԱԳԱՀ**

25 օգոստոսի 2026 թվականի
ՍԴԱՈ-188



Ա. ԴԻԼԱՆՅԱՆ